



5  
A  
5

35 **CLERICIS** (Antonius a) DISSERTATIO MEDICA INAUGU-  
RALIS DE ASPARAGO. Sm. 4to, modern boards. £3 10 0

*Jodocus Wilhelm Kohles: Altdorf [1715]*

\*\* Surg. Gen. Lib Cat., I.S. III., 220. The above book is the earliest work on the medicinal properties of asparagus quoted by the Surgeon's General's Library Catalogue, the next being dated 1778, after which follow six others all published after 1800. As this catalogue is, probably, the largest one in the world devoted exclusively to medical subjects (41 volumes 4to, each volume about 800 pages) we may conclude that the present book is one of the earliest on asparagus and that the total number of monographs before 1800 is probably under five.

Clericus  
£3-10-0

907







DISSERTATIO MEDICA INAUGVRALIS  
DE  
**ASPARAGO**

QVAM  
DIVINO SVB PRAESIDIO  
ANNVENTE  
*GRATIOSA FACVLTA TE MEDICA*  
IN CELEBERRIMO, QVOD ALTDORFI FLORET,  
NORIMBERGENSIVM ATHENÆO,

**PRO LICENTIA**  
**SVPREMOS IN MEDICINA**  
**HONORES ET PRIVILEGIA DOCTORALIA**  
**RITE CONSEQVENDI,**

PVBlico EXAMINI SVBJICIT  
*AD. D. XXV. JVN. A. C. MDCC XV.*

**ANTONIUS A CLERICIS**  
CVRIA-RHAETVS.


---

*ALTORFI*  
LITERIS JODOC. GVILIELM. KOHLESII, ACAD. TYPOGR.

Digitized by the Internet Archive  
in 2018 with funding from  
Wellcome Library

<https://archive.org/details/b30515348>





## PROOEMIUM.

**C**ogitanti mihi, qualem Thema eligerem, inauguralis meæ dissertationis, ipsa præsens anni periodus ASPARAGVM suppeditavit, plantam pharmacopoliis pariter ac culinis frequentatam, & Medicinæ non minus quam victui dicatam. Magni semper æstimatæ fuerunt a recte sentientibus illæ res, quæ alimenta præbent medicamentosa aut Medicamenta alimentosa; e quorum numero Asparagum esse nemo nisi rudissimus ignorat. Neque reformidandam mihi puto reprehensionem, quasi circa rem vulgo cognitam versaturus, inanem operam collocarem. Stant pro me magnorum ævi prisci virorum exempla, Catonis præsertim, gravissimi Romanorum, qui Brassicam ejusque miras virtutes prolixè celebravit, quod etiam ante illum Pythagoras, Chrysippus & Dieuches inter Græcos, quisque singulari libro susceperunt Plinio teste; ex quo etiam discere licet, quod Moschion, Græcus pariter Medicus, unum de raphano volumen scripserit. Antonium Musam Lactucæ commentatio Cæsari Augusto facta non solum opibus & honori-



honoribus, dum *viveret*, *auctum*, sed & *historiis ad hæc usque tempora memorabilem reddidit*.

*Esto igitur mihi ASPARAGVS dignum satis Thema, in quo ingenium meum exercerem, & profectus in studio Medico qualescumque declararem, insimul etiam veluti specimine quodam ostenderem, quod liceat in vulgarium quoque rerum examine ultra vulgus sapere.*

S. I.



*Vocabula esse rerum involucra*, plerique eruditorum statuunt, & propterea in tractatione rerum non omnino negligenda contendunt. Quare & mei muneris fore arbitratus sum, ut ante omnia concinnam ASPARAGI onomatologiam traderem. Verum enim vero, cum incidissem in epistolam *Gabr. Fallopii* (a) quæ is ad *Hieronimum Mercurialem de Asparagi appellatione & synonymis* quamplurima perscriptit, dubitare cœpi, an non consultius de iisdem plane abstinerem: Tandem vero pauca saltem quædam in medium proferre decrevi, ne fusque deque habuisse videar inveteratam consuetudinem. Est autem, nemine contradicente, *originis græcæ ὁ ἀσπάραγος*, tametsi e *Latinitatis fontibus* derivatum, & ab *asperis virgultis*, aut *scapis asperis*, dictum, primo autumaverit *Varro*, (b) statim tamen semetipsum corrigens atque concedens, *græcum esse*. Unde vero idem deducendum sit, vix operæ pretium esse puto cum *Lexicographis* disputare, ad quos potius remissum volo quemlibet,

(a) *Tract. de Medic. simpl. facult. in fine.* (b) *de lingua Latina L. IV.*



libet, qui hujusmodi subtilitatibus & conjecturis impensius, quam ego, delectatur. Hoc obiter tantum annoto, quod *Athenæus* (c) memoriæ prodidit, quosdam Græcos olim scripsisse per Φ, ἀσφάραγον.

§. II.

Quemadmodum autem *Lātini*, sic & aliæ gentes per Europam cultiores, in suam quæque Linguam a Græca transsumpserunt *Asparagi* dictionem, A tamen, litera interdum rejecta; unde & Germanorum *Spar- gel/ Spargen/ Sparschen*: Quibus præluceat autoritas *Theodori*, Medici veteris Latini, apud quem (d) bis legitur *Sparagus*. Cæterum hoc non debet prætermitti silentio, quod *asparagi* vocabulum, *Galeno* (e) docente, omnes propemodum teneros caules & germina tenera, seu ex oleribus & herbis, seu ex suffruticibus, seu ex fruticibus arboribusque, designet; per antonomasiam vero peculiari plantæ generi attribuitur, de quo unice mihi sermo est, exclusis reliquis *aliarum plantarum turionibus*, aut teneris novisque germinibus.

§. III.

Jam, missis vocabulis, ad rem ipsam realemque descriptionem progredior. Vix autem ullibi apud Botanicos clarius delineatas iuvenio *Asparagi* notas genericas, quam apud *Tournefortum* (f) qui talem exhibet descriptionem: *Asparagus* est plantæ genus, flore roseo, senis plerumque petalis in orbem positis constante; ex cujus meditullio surgit pistillum, quod deinde abit in fructum mollem, seu baccam ferè globosam, seminibusq; foetam, ut plurimum duris. His notis addenda folia te-

A 3

nuia

(c) *Dipnosoph.* Lib. II. cap. 22. (d) *lib. de dieta* cap. X. (e) *lib. II. de aliment. facultat.* (f) *Instit. Rei herb.* pag. 300.



*nuia.* Quomodo alii Botanici e. g. *Paulus Amannus* cum *Morifono*, *Hermannus*, *Rajus*, secundum diversas methodi suæ regulas GENVS ASPARAGI collocaverint, e sigulorum scriptis perspicuè satis indicavit Celeberrimus ipse Botanicus D. *Volckamerus* (g): Mihi sufficit hoc monuisse, quod omnes *ad herbarum bac-ciferarum classem*, suadente sic fructificationis caractere *Asparagum* retulerint.

§. IV.

Explanato nunc genere *Asparagi*, æquum est, ut *species* quoque ad idem pertinentes recenseam. Et quidem ex veterum autorum ordine *Theophrastus*, unicum saltem, eumque spontaneum describit *Asparagum*: *Dioscorides* verò & *Plinius* duplicem agnoscunt, *sylvestrem* & *altilem*, aut *sativum* sive *hortensem*; quamvis controversum sit inter rei herbariæ scriptores, *utrum noster hodiernus altilis Asparagus idem sit cum isto Dioscoridis, an ab hoc diversus?* Qua de re liberaliter admodum disceptavit *Joh. Bodeus à Stapel* (h). Recentiores autem, præsertim uterque *Baubin*, plures commemorant *Asparagi species*: Sed nemo majorem numerum collegit quam laudatus *Tournefort*, & *Joh. Rajus* (i); Et ille quidem l. c. novem species exhibet, quibus alias quatuor in *Corollario* (1) adjicit, adeoque in universum Xij. species enumerat. *Rajus* autem in tomo primo *historiæ plantarum* quinque saltem differentias describit, ast in tertio tomo alias duodecim superaddit, ut sint conjunctim species xvij. Neutiquam vero pro ratione instituti mei necessarium duco, *appellationes ac descriptiones singularum specierum istarum* huc transferre; qui

(g) *Flor. Noriberg.* pag. 48. (h) *Comment. in Theophr. H. P.* pag. 602. (i) *Hist. Plant.* Tom. I. p. 683. & Tom. III. p. 352. (1) pag. 21.



qui mihi saltem gratulor, quod plerasque, cum duabus etiam nondum descriptis viderim in locupletissimo Herbario vivo *Magnifici hujus Academiae h. t. Rectoris, Viri Prænobilissimi, Excellentissimi atque Experientissimi, D. D. LAVRENTII HEISTERI, Medic. Doct. Theoret. Anat. & Chirurg. Profess. Publ. meritissimi, Patroni ac Præceptoris mei honoratissimi.*

§. V.

*Duas tamen Asparagi species paulo plenius mihi describendas esse existimo, quæ scilicet notum præ ceteris usum & olim habuerunt & hodiernum habent in victu & Medicina. Harum prima, & quasi omnium instar est quam ante jam nominavi, sativus nempe aut hortensis asparagus, cujus formam, quoad singulas partes accurate satis delineavit Valerius Cordus (m) sequentem in modum: Caules emittit primo vere teneros, longos, teretes, virides, glabros, et sine foliis, ab uno cespite plures, qui paulatim in numerosos, tenues & lentos dividuntur ramos & virgas, & circa has folia frequentia, uncia longitudine, individua & capillorum aut setarum modo tenuia: tota itaque herba cum fœniculo aliquam in foliis similitudinem habet, & duorum cubitorum longitudinem petit. Flores, sole in geminos transeunte, circa ramulos copiosos, parvos & pallidos producit, & post eos baccas pisi quantitate, rotundas, rubentesque, intus carnem suam duo aut tria nigra & corneæ soliditatis semina claudentes. Radicibus nititur perennibus, numerosis, ab uno transverso, & propter caulium vestigia, aspero, villosoque dorso, utrinque in obliquum descendentibus, longis, teretibus, lentis, foris*



foris cineraceis, intus autem candidis, quibus dulcis & glutinosus est sapor: Cauliculi item teneri admodum suavem saporem habent, sic ipsa etiam *semina*.

§. VI.

*Altera* quam descripturus sum *Asparagi species*, *sylvestris* cognominatur, & complurium Botanicorum suffragio, *eadem planta est cum asparago petræo*, aut *μυάναθα Dioscoridis*, & cum *Corruda Plinii*, aliorumque veterum Latinorum. Concinnam ejus historiam a *Johanne Baubino* (n) mutuare placet. Duris contortis angulosis *virgultis* ad hominis altitudinem fruticat, in frequentes *ramulos* striatos, alternatim fere divisos: *foliola* ex uno puncto plura exeunt, veluti in larice, *duriora & breviora quam Asparagi altilis*, & *spinarum quam foliorum nomine digniora*, quippe acriter pungentia: *Flores* parvi pallidi, altilis *Asparagi æmuli*: *baccæ* prima fronte ejusdem baccis similes, ingrati saporis, & teredini obnoxia, in quibus primum occurrit pellicula alba pellucida, deinde rubra, densa, tertio nigricans, postremo *semen* unicum vel duo alba, latefcentia, duriuscula.

§. VII.

Non me latet, *Corrudæ nomen aliis quoque sylvestribus & spinosis asparagi speciebus tribui*, sed tamen ea quam descripsi, notas *Corrudæ Veterum* manifesto magis quam reliquæ præse ferre videtur. Existimant nonnulli *Corrudam* dici a *corruendo*, quod graciles cauliculi & ramuli istius *asparagi*, quando adolevit, facile corruant; quod etiam significari volunt per Atticum vocabu-

(n) Tom. III. Hist. plant. fol. 221.



cabulum à *Plinio* allegatum, Orminium ἀπὸ τῆ ὀρμᾶν, a ruendo derivandum. Μούνασθαι vero, i. e. muris spinam, nuncupatum volunt sylvestrem asparagum, propter exiguorum foliorum rigidas aciculas. *Hyacinthus Ambrosinus* (o) corrudæ synonymon facit palatium leporis, quoniam lepores sæpissime in hac herba stabulentur, cum densissimos supra terram producat ramos. Sed enim vero id fortasse rectius competit *Asparago sylvestri tenuissimo folio Cass. Baubini*, sub eo enim, utpote mollioribus foliis prædito, lubentius quam sub *Corruda* aut aculeato asparago habitare lepores credibile est. Nec veritatis caret specie quod aliqui suspicantur, molliorem istum Asparagum sylvestrem eundem esse quem *Plinius* (p) indigitavit: Est & aliud genus incultius asparago, mitius corruda, passim in montibus nascens, refertis superioribus Germaniæ campis, non in facto *Tiberii Caesaris dicto*, herbam ibi quandam nasci similimam asparago.

§. VIII.

Est hinc opinio quorundam, quod iste sylvestris, & mollibus foliis asparagus, ab hortensi non nisi cultura differat, cujus beneficio ille in hunc facile mutari et esui proinde aptus reddi queat. Sed vero contrarium evincit *Tourneforti* (q) sequens observatio, quam e Gallicalingua latinam feci: Sylvestris ea species asparagi proxime ad communem sativam colitur jam inde a longo tempore in horto Regio: verum ille hactenus nihil mutatus, imo vero tota planta gracilior reddita est, quam in campo deprehendi. Quod autem hæc sylvestris aut quæcunque alia species Asparagi nascatur arietis cornibus

B

bus

(o) *Phytologia* p. 78. (p) lib. XIX. cap. 8.



*bus tufis atque defoffis*, uti quidem *Plinius* l. c. se invenisse testatur, vel quod integra ista cornua, si perforantur & pangantur, asparagum producant, uti *Cassianus Bassus* (r) perhibet, id sane nefas est credere, eo sensu quo aliqui recentiorum volunt, quasi præter omne semen, aut radicem propriam, *asparagus* proveniat ex istis cornibus; quorum tamen sulphureo-salina & gelatinosa substantia, ut aliarum plantarum vegetationem, notissimo experimento, ita seorsim *asparagi* feliciorum atque lautiorum proventum sine dubio efficiet.

§. IX.

Pateretur jam occasio ut me diffunderem in diversos colendi asparagum modos. Quamvis enim nullum sit dubium, quin, sicut olim variis in locis *spontanea* extiterit, ita hodie alicubi etiam non culta inveniantur *præstantior illa species Asparagi*, quam nos hortensem vocamus; ipsa tamen jam ante Christum natum in hortos transferri & in his coli cœpit, certè jam Catonis tempore; quem miratur *Plinius*, quod nihil diligentius comprehenderit, quàm *asparagi sationem*, quod & novissimum libri ejus sit, ut appareat repentinam viro curam fuisse. Ac sane *Catonis* (t) præcepta *de asparago serendo*, sunt adeò ampla & luculenta, ut vix intelligam quid ipsis adjecerit posterorum industria. Si cui tamen ista non suffecerint, is confere dignabitur reliquos rei rusticæ scriptores, *Columellam* & *Palladium*. Ex recentioribus autem oppido multi culturam *Asparagorum* docuerunt, imprimis verò perspicuè *Joh. Sigismundus Elsholtius* (u).

§. X.

(r) *Lib. XII. cap. 18.* (t) *de re rustic. cap. penult.* (u) *Horticult. germ. edit, p. m. 161.*



## §. X.

Ceterum id planè constat, potissimum *finem culturæ asparagi* esse, ut *turiones* ejus, aut *prima*, quæ radix quotannis protrudit *germina*, *crassiora* magisque *succulenta* evadant. Tales olim *Ravennæ* in hortis provenisse scribit *Plinius* *altiles asparagos*, ut *tres eorum libram pependerit*. Imò etiam in Anglia, Martino Listero (x) asseverante, *centum Asparagi aliquando triginta libras pependerit*. Profecto autem ille *Asparagus* qui in horto *Eystettensi delineatus extat* mole adhuc est superior. Omnem verò fidem excedit quod *Athenæus* l. c. narrat, in *Lybiæ Getulia instar arundinis Cypriæ Asparagos crassescere*, *assurgereque ad cubitos circiter viginti*: & in *montosis & vicinis Oceano locis ejus regionis ad ferulæ crassitiem augescere & viginti cubitorum proceritatem*. Tam *portentosos Asparagos* ego mecum considerans, utendum mihi censeo idonea epicrifi, quam alia occasione quidam adhibuit: *non quidem in-video, sed miror!* Sed extra jocum, solent interdum *Asparagi*, *grandescere ultra modum*, plerumque tamen tunc *monstruosam induere formam*; cujusmodi est ille quem *Joh. Bauhinus* l. c. *Asparagi platycaulis* titulo descripsit. Similia exempla memorantur ab *Elsboltio* laudato & in *Ephemeredibus Acad. nat. curios* (y).

## §. XI.

Absoluta sic breviter, quousque licuit, *botanica Asparagi historiâ*, ad *medicum ipsius examen* me nunc accingo, id præmonens, quod cum *tres distinctæ partes Asparagi* (saltem sativi) in usum trahi soleant, *radices* nempe, *turiones* seu teneri caules, & *semina*, de

B 2.

fingu

(x) Anotat. in *Apiciump* p. 77. (y) *Dec. III. Ann. II. p. 157. & Ann. VII. & VIII. p. 31.*



singulis etiam distinctè pronuntiandum mihi esse videatur. Absit autem ut subscribam rigidæ censuræ & iudicio parum æquo Viri, alioquin æquissimi & gravissimi *Dan. Ludovici* (z), *Asparagi turiones* linguendos esse *delicatulis*, *semen vanis exoletisq;* compositionibus, *radicem* (inter tot *equipollentes*) *hortis*. Quamvis enim lubens fatear, non esse adeò absolutam necessitatem *Asparagi*, ut eo carere nullatenus, aut non alia in locum ejus substituere Medici queant, propterea tamen non valet consequentia, quod omnino negligi & ex apparatu rerum *salubrium*, tam ad diætam quàm ad Pharmaciam pertinentium *proscribi* debeat. Grata est plerisque hominibus, tam in alimentorum quàm remedium usu *varietas*; hanc nisi observaverit vel admiserit Medicus, ubicunque tutò licet, morosi hominis speciem atque titulum vix effugiet, quippe qui eadem semper chordâ oberret, nec possit, nec velit *jucunde* curare, & indulgere aliquid appetitui hominum, vel consuetudini. Quare maneat *Asparago* sua laus & utilitas, quam ipsi à tot seculis, tot magni medici per experientiam edocti, attribuerunt.

§. XII.

Dicam verò prius de *turionibus*, aut *teneris asparagicaulibus*. Hos apertè constat abundare multis *particulis aqueis ac terreis*, nec paucis *salino nitrosis*, tum & quibusdam *sulphureo mucilaginosi*. Et *aqueæ* quidem, è succo copioso, *terreæ* verò è solida substantia post exsiccationem remanente, ad oculum patent: *Salinas* sapor & virtus diuretica prodit: *sulphureas* foetor, quem *urina* hinc contrahit; *mucilaginosas* denique facultas nutriendi arguit. Hinc facilè colligitur, istos *turiones*, ratione

(z) *Pharmac. Dissert. I. p. m. 181.*



tione *primarum* (olim ita dictarum) *qualitatum*, valde *temperatos* esse, ac ideo plerisque hominum complexionibus neutiquam adversos; unde etiam *promiscuè victui inserviunt*, citra singularem aliquam dyscrasie metuendam noxam. Dum autem de *manifestis effectibus illorum asparagi turionum* sigillatim agere sulcipo, primum occurrit delibanda quaestio, *an & quomodo asparagus nutriat?* Certe quod *particulis ad alendum idoneis* gaudeat, solus sapor evincit, γλισχρόν τε, id est *lentum, viscosum* aut *glutinosum* quid in *Asparago* prodens. Quam ob rem non inepte judicavit Simeon Sethi (a) *Asparagum inter omnia olera plurimum alimenti habere, ipsiusque substantiam medium locum mereri inter alimenta plantarum & carniū*. Cui quidem contraria quodammodo videtur Galeni (b) sententia, qui *parum nutrire statuit Asparagum, magis tamen quam reliqua sui generis*, quod idem fere est, quam quod Sethi asseruit; neque enim is alio sensu, quam *in comparatione cum ceteris oleribus, multum alere* contendit. Minime vero audiendus est Celsus (c) qui *Asparagum*, quoad nutriendi facultatem, brassicae, betae & porro quoque postponit: sed ille forsan *sylvestrem* tantum intellexit *Asparagum*, sativo, uti macilentiozem, sic ad nutriendum sine dubio ineptiozem.

§. XIII.

Antequam ad alias *turionum asparagi* dotes exponendas progredior, pauca quaedam *de modo illos ad victum præparandi* e differam. Quod coqui debeant isti *turiones*, in confesso est, sicut & hoc, quod *vehementem ac longam coctionem respuant*. Inde natum pro ver-

B 3

bium

(a) de Aliment. facult. p. m. 8. (b) L. II, de Aliment. facultat. cap. 59. (c) L. II, cap. 18.



bium, *Octavio Augusto Cesari familiare*, ceu *Suetonius* tradit: *Velocius quàm Asparagi conquuntur*: ad exprimendum negotium quod cito confici potest ac debet. Omnino autem servandus est *modus in asparago coquendo*; quod si enim *mitius* id fiat, cruditates relinquuntur, tam gustui plerorumque, quàm ventriculo ingratae; *nimum* autem & ad extremam usque mollitiem *coctus*, multum substantiæ suæ delicatioris & laudabilis amittit, quo minus nutrire & alias utilitates desideratas præbere valeat. De *duplici asparagum præparandi ratione*, culinæ usitatâ, nempe vel in jussulo calido, vel cum aceto & oleo in morem aliorum acetariorum, nil attinet dicere, nisi quòd *posterior modus sæpe in abusum transeat*, quando gratum istud gulæ irritamentum, & largius ingeritur, & plus interdum aceti, salis, atque piperis secum abripit in ventriculum, quàm bonæ valetudinis prudens observatio permittit. Singulares *cautelæ circa præparationem asparagi* annotavit *Elsholtius* (d). Quoniam verò per paucos admodum menses recentia haberi possunt *tenera & esui apta asparagi germina*, siquidem appetente Julio mense aut nulli amplius succedunt, aut qui succrescunt nimis graciles, parumque succulenti, sed magis lignosi & ingrati existunt, eapropter *ingeniosa hominum gula* cogitare cœpit de *artificio ita condiendi asparagum*, ut reliquis etiam anni temporibus idem præsto esse ac mensis apponi queat. Rudis admodum est præscriptio *Apicii Cœlii* (e) *Asparagos siccabis, rursus in calidam submittes*. Recte ad hunc locum *Mart. Listerus*: *hoc novum est, & nostratibus, quod scio, inusitatum; apud nos tamen condiuntur ad intinctus*. Meliorem hujus condituræ methodum

(d) *Dietetic. seu Tisch Buch* p. m. 358. (e) *de re coquin. Lib. III. cap. 3.*



dum edocuit *Elsholtius* l. c. pag. 426. Totum artificium in hoc consistit, ut *Asparagi* semicocti in ollis sat capacibus repositi mergantur forti muria, cui deinde ad duorum digitorum eminentiam superinfunditur butyrum liquatum.

§. XIV.

Cæterum *asparagi turiones* jure merito referuntur inter *alimenta εύσπλαχα* i.e. *Ventriculo convenientia, & facile digerenda*, ut parum intersit quo tempore prandii aut cœnæ assumantur: Ideoque supervacuum mihi apparet *Vopisci Fortunati Plempii* (f) monitum, *Asparagos aliquanto ante cibos alios devorandos esse, ut renes purgent, quos alioqui onerarent si ultimo loco à saturis manderentur*. Quod vero siccus natura sit *asparagus* & *alvum sistat*, *Hippocratis* suffragio, id quidem rursus non de *hortensi*, sed de *sylvestri* ac *petræo*, fortasse tunc unicè cognito, pronuntiandum erit; quamvis & hujus *cauliculos in cibo coctos, ventrem emollire* testetur *Dioscorides*: A nostro sane *altili asparago* effectum istum nemo facile percipiet, qui potius *ad aperiendam* quam *ad constipandam alvum* conducit.

§. XV.

Altioris indaginis est quæstio, *an venerem incitet, an magis ad sterilitatem disponat esus asparagi?* Utrumque affirmant diversi autores, non absque fundamento. *Veneri favere* videtur, quatenus *nutrit & facile digeritur*, particulasque salino-sulphureas possidet, quæ ad generationem & orgasmum seminis, utcunque possunt facere. Quemadmodum etiam hodie id vulgo persuasum est, præeunte jam dudum *Simeone Sethi* l. c. qui  
expres.

(f) de *Togat. valetud. tuenda* p. 230: (g) *Lib. II. de diata, text. 26.*



expressis verbis affirmat, *asparagos augere genituram*. Num vero, & quâ ratione *sterilitatem* inducant, nunc disquirendum est. Præter numerosa medicorum testimonia, id simpliciter asseverantia, apprime idem confirmat specialis casus à *Christ. Franc. Paullini* (h) observatus: Nobilis femina XXII. annorum, sana, & laudabilis temperamenti, in maximis, & tantum non quotidianis deliciis habebat *turiones* asparagi delicate præparatos. Mansit interea in splendido conjugio ad triennium usque sterilis, variis usa consiliis sed frustra. Aliquando ad prandium ab ea deductus, miratus sum, quam ayide vorarit *asparagos*: Causam sterilitatis interim a me quærenti, dixi, quod olim in *instit. Mœbian. l. 4. part. 2. cap. 3. p. 463.* legeram, quod sc. usus eorum crebrior & largior foeminas *steriles* reddat. Illa quasi attonita omnes omnino æternum ejurans unice querebatur, se neminem unquam mortalium monuisse, nunc vero cautius mercari velle, uti quoque fecit. Facta tandem venustæ filiolæ mater.

§. XVI.

Causam hujus effectus, tametsi ipsum haud perpetuum fore existimem, latere suspicor in eo, quod cum *asparagus* potenter abstergat & aperiat, uterus hinc continuo ita sollicitetur, ut magis ad egerendum quam ad recipiendum & retinendum aliquid idoneus existat. Cui conjecturæ haud exiguam affundit lucem, quod *Sim. Sethi* scribit, *asparagum ciere menses*. Atque ita est omnino, indeque per accidens quasi poterit oriri *sterilitas* apud mulieres tenerioris complexionis, & quarum uteri promte afficiuntur per abstersiva & aperientia remedia. Non perperam igitur *Joseph. Quercetanus* (i) hortatur foeminas,

(h) *Ephem. Acad. N. C. Dec. II. Ann. V. Append. p. 67.* (i) *Dietet. polybistor. p. m. 282.*



nas, ut asparagorum esu abstineant, ne ipsis nimium indulgentes sterilecant; cum interim viris inde semen augeri & venerem excitari, in dubium non sit vocandum.

§. XVII.

Explorata autem magis habetur virtus turionum asparagi diuretica, quam complures medici ad calculum quoque & sabulum mucumque tartareum in renibus & vesica genitum, efficaciter educendum extendunt. Quid, quod Dioscorides expressis verbis perhibet, altilis asparagi teneros cauliculos cum vino albo tritos, renum dolores sedare, assum autem coctumve, urinæ stillicidium difficultatemque ac dysenterias mitigare. Præcipuum illius virtutis diureticæ argumentum peti solet ab odore gravi seu foetore, quem urina contrahit non diu post asparagi commestionem. De hoc phænomeno dignus notatu est apud Simeonem Sethi locus; Urinam movere, & renum obstructions recludere asparagum, exinde patet, quod urinam in suum odorem vertat, uti id animadvertitur ipso, non aliter quam lasere, comesto. Verum enim vero non æque proprius asparagi odor, certe non solus, sed in herbaceo aut oleraceo singulariter foetidus, grave quid sulphureum ac putridum spirans, in urina percipitur, idque in aliis citius ac vehementius, in aliis tardius atque mitius.

§. XVIII.

Vnde singularis illa urinæ qualitas originem ducat, non æque inter autores convenit. Quidam existimant, quod ea non tam ab ipso asparago quam a recrementis salino-sulphureis putrescentibus e massa sanguinea per asparagum ad renes & vesicam corrivatis, oriatur. Alii ex adverso solam pro causa agnoscunt asparagi substantiam, quæ sicuti per se ad putredinem concipiendam promptissima sit, ita, quando mediante chylo transierit in sanguinem, non possit non putredinis alicujus characterem ac



*fætores* ipsi imprimere. Illam vero tantopere accusatam *asparagi pruritatem* ad putrescendum confidenter admodum deducit *Steph. Blankardus* (1) ab hoc unico, quod *Asparagus coli* soleat in solo valde stercoreato, ex quo particula *fimi* a radicibus recepta per totam *asparagi* plantam largiter dispensentur. Sed quis non videt, quam ficulnea existat hæc ratio? dum notissimum est, alia complura olera, simili, nec minus stercoreato, quam *asparagus*, solo plantari, a quorum tamen frequenti esu ne minimam *fætoris* notam in *urina* persentiscere licet.

§. XIX.

Ad me quod attinet, rem ita mihi concipio, quod tam *asparagus* *substantia sua*, quam *digestionis actio* in corpore humano ad istum effectum utrinque concurrant. Et *asparagus* quidem offerendo *materiam corruptioni* contrahendæ obnoxiam, quæ tamen a peculiari, nec tam facile definienda *digestionis aut coctionis energia* sic disponitur, ut *putredinis atque fætoris habitum* velocius induat, quam alia ejusdem generis esculenta, & se per *urinam* prodat, cui promovendæ singulariter aptus est *asparagus*. Cæterum nec id negaverim, quod pro diversa constitutione *individuum*, & *massæ sanguineæ* majori vel minori puritate, intensior aut levior enasci possit ab *asparagi* *comestione* *fætor*, prout nempe plures vel pauciores *putridæ salino-sulphureæ molecule*, cum istis *asparago propriis* ex *massa sanguinea* per *urinam* præcipitantur.

§. XX.

Haud exiguam *asparagi turionibus* maculam inurit *Jo. Bapt. van Helmont* (m), quando ipsos infimulat *facultatis generandi calculum aut sabulum* saltem, quatenus *putrilaginem urinae* pariunt: testatur enim se vidisse *Furisperitum*, non ante afflictum *lithiasi*, nisi postquam a largiori *asparagi* esu do-

(1) tract. de operat. medicam. cap. V. p. m. 114. (m) de lithiasi cap. V. §. 17.



*domum redisset, ac deinceps non tam calculis quam subtilissimis arenis, præditus, aliquot annos, singulis forte quindenis, sub atroci dolore decumberet. Vereor autem, ne paulo iniquius inculpaverit asparagum Helmontius: Quid si enim ille Jurisperitus, jam ante asparagi esum, coacervatas in renibus suis fovit arenulas? quæ ab illo tempore, quo excretionis stimulum ab asparago acceperunt, subinde cum urina secesserunt, aliis (fortasse temperamenti hypochondriaco-scorbutici culpa) denuo succrescentibus, morbique diuturnitatem inferentibus. Potuit tamen etiam fieri, ut largior asparagi assumptio cavitates renum seu pelvim eorum adeo distenderit, & amplificaverit, ut labefactato tono ansam præbuerint tartareis massæ sanguineæ recrementis, ibidem moras nectendi & in sabulum successive crescendi. Non parum me confirmat in hac opinione, consimilis ab aliorum diureticorum liberaliori usu eventus. Imprimis hic refero memorabilem casum, quem mihi narravit Vir Magnus, Pranobilissimus, Excellentissimus Dn. D. IOH. IAC. BAIERVS, Facultatis Medicæ Senior & h. t. Decanus spectatissimus, Patronus ac studiorum meorum Promotor atatem colendus: Fœmina honesta annorum circiter xxx. ultimis mensibus graviditatis vehementi (ut solet fieri) appetitu ferebatur ad fraga, quorum tunc erat maturitas. His aliquoties largissime ad satietatem assumtis, non multo post incepit lumborum dolores & calculi symptomata sentire, a quibus antehac nunquam tentata fuit. Ab illo tempore singulis fere septimanis, interdum continuis diebus plusculis non sine molestia excrevit multum sabuli, calculis quandoque lentis ac pisi magnitudine intermixtis. Cui malo etsi varia opponerentur remedia, ab ipso tamen penitus liberari ægra non potuit.*

§. XXI.

Quemadmodum ergo, *Asparagus*, perinde ut alia *esculenta diuretica*, veluti per indirectum nocere potest



immoderate utentibus, ita si quis *modice* ipsum assum-  
pserit, non facile hinc lædetur, quin potius *multipli-*  
*cem in aperiendo & abstergendo* percipiet *commoditatem*.  
Ad abusus verò effectum hoc pertinet, quod *Plinius*  
scribit, *asparagos vesicam exulcerare*: Verum id rarius  
contingere arbitror, tametsi non impossibile sit, im-  
modicam *Asparagi quantitatem* nimium abstergere pa-  
rietes vesicæ, & *salino-nitrosis particulis* quodammodo  
*erodere* posse fibras ejus. Est porro *noxii abusus aspa-*  
*ragi* aliquale specimen, quod non semel expertus mihi  
asseveravit *spectatissimus Dn. Decanus*, *hæmorrhoidum*  
nempe *intumescencia ac dolor*; quamvis, ubi illæ aper-  
tæ ac fluentes redditæ fuerint, non modo non in dam-  
num, sed in singulare beneficium cedant hypochon-  
driacis, arthriticis, cachecticis.

§. XXII.

Effet in proclivi, *plures turionum asparagi virtutes*  
annectere, quas *Dioscorides* præsertim ac *Plinius*, nec  
non *Sim. Sethi* commemorant; cujusmodi est, quod *pal-*  
*pitationi cordis, colicæ, ictero, coxendicis cruciatui* me-  
deatur, & quod *oculis claritatem afferat*. Quoniam  
vero experimentis & practicorum testimoniis destituor,  
nolo istis diutius immorari, persuasum tamen habens,  
quod in affectibus nominatis & affinibus aliis *temperan-*  
*do & aperiendo* prodesse aliquantulum *asparagus* possit.  
Peculiaris est observatio quam ex *Avicenna* in libellum,  
*Antonii le Grand* nomine editum (n) transumptam in-  
venio: *Inter ea quæ nitorem & pulchritudinem corpori-*  
*bus inducere perhibentur Asparagorum usus connumera-*  
*tur, cujus efficacia a multis in corpore colorando fere mira-*  
*bilis judicatur. Asparagi foetentem reddunt urinam, &*  
*per illam pravos corporis expurgant humores*: ob id mi-  
rum

(n) Curios. rem. nat. scrutat. p. m. 169.



rum non est, si iis evacuatis, corpus reliquum non modo odoratum reddatur, sed etiam nitidum, & coloratum: quippe ex humorum pravorum congerie & palliditas & deflorescentia nobis innascitur, quibus cessantibus cessat deformitas, & color nitidus exoritur. Sit fides penes Autorem! Mihi sane ista *Asparago* tributa virtus non firmiori talo stare videtur, quam ille effectus, qui apud *Martialem* lepori adscriptus legitur, quod is, qui hunc manduca-verit, formosus ac pulcher intra septem dies sit futurus.

§. XXIII.

Satis jam multa de *asparagi turionibus* in medium me protulisse puto, ut nunc ad *reliquarum ejusdem plantæ partium*, quæ in usu sunt, expositionem pergere queam. Unicum vero dubium hic me paulisper detinet; quid sentiendum sit de *aliarum asparagi specierum turionibus*, & an non perinde omnes eandem præbere possint utilitatem? sed facile me expediam si dixerim, plerasque differentias *sua vitatem asparagi altilis non assequi*; uti sane *Petrus Magnol* (o) de *marino asparago* testatur, quod ejus turiones *amarore* se prodant, cum *sylvestris asparagi*, licet iisdem fere locis cum *marino* oriatur, *turiones*, semper tamen *dulciores* existant. Perperam igitur *Fallopius*, & post hunc *Rajus* existimaverunt, *maritimum asparagum* à *sativo specie* non differre, cum is ne quidem ad *Corrudæ* aut *sylvestris asparagi sua vitatem* accedat. Nec probabilis est *Raji* conjectura, per solam in hortos *transplantationem* mutari posse *maritimum in formam sativi*, quando ne cum *sylvestri* quidem, qui *sativo* admodum cognatus esse videtur, experimentum *transmutationis* succedit, ceu in §. VIII. demonstratum est. Quo magis autem *sativus aspara-*



*gus grato sapore* reliquis speciebus palmam præripit, eo magis ab una aut altera harum superari poterit *virtute medendi*, ut ita *sativus suavitatem*, *sylvestris & marinus medica virtute* præstare videantur.

§. XXIV.

Seorsim nunc de *radice asparagi* acturus obiter animadverto antiquum vocabulum *spongiæ*, ita enim *radiculas asparagi inter se implicatas atque connexas*, ut *quasi unitatem faciant*, ab olitoribus appellari, autor est *Columella* (p) quamvis nomen illud magis quadrare videatur in *supremam radicis partem*, quæ alias, *caput* dicitur, hæc enim rara & porosa & *revera spongiosa* apparet. Ceterum id ominino concedendum esse arbitror compluribus medicis, *quod Asparagi sylvestris radices hortensibus præferendæ sint*, exemplo analogo *cichorei* & aliarum sylvestrium plantarum, quæ sponte nascentes nobilioribus sæpe pollent virtutibus quam quæ in hortis coluntur. Ad *temperamentum Asparagi radicis* quod attinet, in eo a *turionibus* differt, quod *magis inclinet ad siccitatem*, & potentius se gerat *aperiendo*, quo quidem respectu *Galenus* (q) radicem turionibus priorem anteposuit.

§. XXV.

Hinc ab antiquo *radix asparagi* numerata fuit *inter quinque aperientes*, quæ variis viscerum obstructionibus referendis & humoribus lentis atque inertibus educendis conveniunt, ut rara sint exempla *infusorum & apozematum aperientium* ac diureticorum quæ istas *radices* excludant. Quare in *singulis affectibus* illis, in quibus *aperiens & abstergens turionum asparagi virtus* antea abs me laudata fuit, *radices* efficacius operari credibile est. Peculiarem usum deprædicat *Galenus* l. c. *quod dentium dolores ea radix sanet*, *siccitatis nomine*, quam  
vel

(p) Lib. XI, de re rustica. (q) de simpl. facult. Lib. VI.



*vel maxime dentes requirunt.* Sed mihi effectus ille ( si quidem succedit ) potius a particulis blandis & sulphureo-mucilaginosis, *paregoricam vim* exerentibus, tum & à salino nitrosis humorum stasin circa dentes solventibus quam a terreis siccantibus pendere videatur. Quod verò ex *Antonio Mizaldo* retulit *Joh. Schenckius* (r) *radices asparagi siccatas & dentibus infixas*, illos *absque dolore eradicare*, apud me quidem vix invenire potest fidem.

§. XXVI.

*Alias insuper virtutes radice asparagi sylvestris* (quam altili præferendam esse jam docui) haud exiguo numero recensent *Dioscorides* ac *Plinius*, e. g. quod decoctum ejus contra elephantiasin proſit, palangiorum morſibus, & puncturis apum medeatur, quod cum vino aut aceto cocta luxatos artus mulceat &c. quibus examinandis, vel approbandis, vel confutandis immorari jam nec volo nec possum. Quemadmodum etiam de *baccis & seminibus Asparagi*, vix invenio memoratu dignum quod addam, præter *Dioscoridis* effatum, quod semen potum ad eadem, ad quæ radix, valeat. Seorsim tamen *Plinius*, autoritate *Chryſippi*, illud comendat contra *miſum ruentum*. Apud neminem vero alium autorem deprehendo quod *Jo. Poppius* (s) tradit, *asparagi baccas siccatas & in pulverem redactas cum aqua fol. querc. assumptas*, brevi tempore *dysenteriam sanare*; easdem quoque, indicio signaturæ coloris, *labiorum fissuras curare*, denique adversus *eryſipelas faciei*, prodesse. His omnibus in casibus, si quid singulare præstant *baccæ Asparagi*, id quidem non tam communibus cum radice particulis, sed abundanti *delicatiori mucilagini*, per saporem manifestæ, tribuendum esse suspicor.

TANTVM!



*Nobilissimo atque Clarissimo*  
**D. N. CANDIDATO**

*S. P. D.*

**JOH. JAC. BAIERVS D.**  
 Ordinis Med. Senior & h. t. Decanus.

**O** Di pueros præcoci sapientia, & qui velocius, quam asparagi coquuntur, ad disciplinæ fastigium contendunt. Medicina præsertim hæc est conditio, ut limatum politumque iudicium requirat, à puero aut adolescente, utut plurimis theoriæ præceptis instructo, hand facile expectandum. Te igitur, Vir Nobilissime, ex quo ad nostram accessisti Academiam, merito magni feci, quod rectum, tuæque ætati omnino conforme iudicium, Artis medicæ fundamentis optime informatum attuleris, cuius beneficio, adhibita insuper singulari industria, mirum quantum profecisti, modico tempore, ut sine magna injuria honores & privilegia Doctorum Tibi denegare non potuerimus. Nec sine fato contigisse arbitror, quod antehac militiam honesto titulo aliquandin secutus, Te præparaveris ad medicam prudentiam, cui sane cum militari magna intercedit affinitas. Ita enim persuasum habeo, Dioscoridem, Jul. Cæs. Scaligerum, aliosque præstantes Viros, bonam peritiæ suæ in re medica partem acceptam retulisse occasione, qua multarum rerum usum in expeditionibus bellicis sunt assecuti. Gratulor propterea Patriæ tuæ, quod non minus idoneum medicum Te sensura sit, quam militem strenuum prius agnovit. Sic fratris beati laudem in medicina facienda in Te transferes; sic venerandi Avunculi felicitatem in medendo attinges; sic nos, qui dignitatem Doctoralem Tibi tribuimus, tam faustis eventibus expectationis & votorum nostrorum perpetim letabimur. Ego vero seorsim, boni ominis ac spei plenus, salutem Tuam ardentibus Deo precibus, me autem Tuo amoris commendo! Dab. Altorfi Nor. d. VII. Cal. Jul, A. R. S. cId Id CCXV.













907  
35



